

Powšitkowne WOZJEWJENJA

njedźelu, 22. meje 2011

Nalětni koncert za hospicnu službu

Chór Lipa, Caritas a Křescansko-socialny kubłanski skutk (CSB) přeprošuja tutu njedźelu, 22. meje, na beneficy nalětni koncert na klóštersku zahrodu w Marijinej Hwězdze. Wot 15.30 hodź. za klinča mjez druhim twórby Bjarnata Krawca a Jana Bulanka. Młodzi hudźbnicy skulojća chórowy koncert z instrumentalnej hudźbu. Po koncerće poskići so kofej a tykanc. Wšitke dochody zarjadowanja so za hospicnu službu Charity naloža.

Wulět samostejacych

Za wulět samostejacych přichodnu wutoru, 24. meje, su hišće někotre městna swobodne. Štóž chce sobu do města Weimara jěć, njech so hač do pónđzele, 23. meje, připođnja w redakciji Katolskeho Posoła přizjewi, telefonowe čisło (0 35 91) 55 02 12.

Bus pojedže po sčehowacym planje:

- 6.40 hodź. Radwor
- 6.52 hodź. Jaseńca
- 6.55 hodź. Chróscicy
- 7.05 hodź. Pančicy-Kukow (šula)
- 7.10 hodź. Wotrow
- 7.15 hodź. Kašecy

Linijowy bus *hač do Chróscic* měł so wužić ze wsow

- 6.23 hodź. Hórki
- 6.28 hodź. Nowa Wjeska

- 6.26 hodź. Róžant (we wsy)
- 6.31 hodź. Smjerdžaca
- 6.35 hodź. Pěskecy
- 6.40 hodź. Njebjelčicy

Linijowy bus *hač do Jaseńcy* měł so wužić ze wsow

- 6.00 hodź. Němcy
- 6.36 hodź. Konjecy
- 6.40 hodź. Ralbicy

Přidatny mały bus:

- 6.20 hodź. Budyšin (Hegelowa)
- 6.45 hodź. Pozdecy
- 6.50 hodź. Prawočicy

Wužiwanje linijoweho busa je w plaćiznje za wulět zapřijate.

Chóry zwučuja za zbóžnoprajenske kemše

Wosom serbskich chórow w projekće Towarstwa Cyrila a Metoda, kotrež zwučuja za zbóžnoprajensku Božu mšu, změja swoju přichodnu probu sobotu, 4. junija, w 16.30 hodź. w Chróšćanskej „Jednoće“. Dalša proba budže srjedu, 8. junija, w 19.30 hodź.

Dwě knize wo Alojsu Andrickim Knižnej premjerje w Smochćicach a Radworju

Składnostnje zbóžnoprajenja Alojsa Andrickeho přihotuje Budyske Nakładnistwo Lusatia knihu z jimacymi němskimi a serbskimi wuprajenjemi kapłana, z listow a nastawkow. Zestajał je knihu pod titulom „Alojs Andritzki – ... dass ich mich freue, trotz allem – Zeichen & Zeiten“ Radworski farar Šćěpan Delan. Słowa kapłana Andrickeho skićeja dohlad do jeho myslenja a do začuwanja. W pozbudźacym poměrje k jadriwym tekstam steja fota znateho lužiskeho fotografa Geralda Große. Kniha změje štwórtk, 26. meje, w 19 hodź. w Smochčanskim Domje biskopa Bena za serbske a němske čitarstwo swoju premjeru. Dźiwadźelnik Beno Mahr čita z nowjeje knihi.

„Alojs Andricki – wobraz žiwjenja“ mjenuje so nowa kniha Ludoweho nakładnistwa Domowina, kotraž so pjatk, 27. meje, w 19.45 hodź. (po kemšach) w Radworskim „Swětluku“ předstaji. Jedyn z hłownych awtorow je Radworski farar Šćěpan Delan. Wón budže z nowjeje knihi čitać, předstaji někotre zajimawe wobrazy a wotmołwi na prašenja zajimcow.

Dalši termin za čitanje z nowjeje knihi je wutoru, 7. junija, w 19.30 hodź. w Chrósćicach na farje.

Koparski turněr ministrantow

Ministranća ze wšitkich serbskich wosadow su na koparski turněr sobotu, 18. junija, do Pěskec přeprašeni. Započatk je w 9 hodź. z Božej mšu we wjesnej kapałce.

„Andricki. Wuznaće“ na DVD

Wuměłstwowy film Wiesbadenskeje widejoweje wuměłče Sonje Toepfer „Andricki. Wuznaće“ předleži mjeztym na DVD. Tuta hodži so přez kniharnje skazać. Film je w nadawku Drježdžansko-Mišnjanskeho biskopstwa nastał. DVD, kotraž je w Lipšćanskim nakładnistwje swjateho Bena wušła, płaći 9,95 eurow.